

REGLUGERÐ FYRIR VÖRÐ - FULLTRÚARÁÐ SJÁLFSTÆÐISFÉLAGANNA Í REYKJAVÍK

(Upphaflega samþykkt á Fulltrúaráðsfundi 19. mars og 21. maí 1940 og breytt á Fulltrúaráðsfundi 19. nóvember 1958, 5. júní 1969, 7. janúar 1974, 17. janúar 1978, 27. janúar 1996, 31. janúar 2004, 10. mars 2010, 19. febrúar 2011, 25. mars 2013 og 5. desember 2019.)

I. KAFLI

ALMENN ÁKVÆÐI

1. grein

Sjálfstæðisfélögin í Reykjavík sem hafa verið viðurkennd af miðstjórn Sjálfstæðisflokksins mynda með sér ráð er nefnist Vörður – Fulltrúaráð sjálfstæðisfélaganna í Reykjavík sem er kjördæmisráð beggja Reykjavíkurkjördæma.

2. grein

Hlutverk Fulltrúaráðsins og stjórnar þess er m.a.

1. Að vera tengiliður á milli sjálfstæðisfélaganna í Reykjavík, vettvangur til að samhæfa starf þeirra, eftir því sem tók eru á og stjórna sameiginlegum málum þeirra.
2. Að stjórna undirbúningi Sjálfstæðisflokksins í Reykjavík við almennar kosningar, þar á meðal að ákveða framboð flokksins og vinna að sem mestri kjörsókn stuðningsmanna hans.
3. Að gangast fyrir fundum og ráðstefnum um mál, er varða Sjálfstæðisflokkinn, starf hans og stefnu og að efna til hverra þeirra aðgerða, sem eru til eflingar almennu flokksstarfi Sjálfstæðisflokksins í Reykjavík.
4. Að sjá um, að alltaf sé fyrir hendi kerfi trúnaðarmanna Sjálfstæðisflokksins í Reykjavík
5. Að skipa, ef þurfa þykir, í samráði við stjórnir sjálfstæðisfélaganna sérstaka kosningastjórn í kjörhverfum Reykjavíkur á kosningaári, til að annast kosningastarf í hverju hverfi.
6. Að hafa umsjón með fjármunum fulltrúaráðsins og annarra sameiginlegra eigna

flokksins í kjördæmunum.

7. Að sjá um, að að flokkskerfið í kjördæmunum sé í samræmi við skipulagsreglur flokksins.

II. KAFLI

SKIPAN FULLTRÚARÁÐSINS OG STJÓRN

3. grein

Í Fulltrúaráðinu eiga sæti:

1. Fulltrúar, sem kjörnir eru í ráðið af aðalfundum sjálfstæðisfélaganna í Reykjavík. Skal fjöldi fulltrúa sem hvert hverfafélag kýs nema 7% af fjölda skráðra félagsmanna á aðalfundardegi. Fjöldi fulltrúa sem Hvöt, Óðinn og Heimdallur kjósa skal nema 5% af skráðum félagsmönnum á aðalfundardegi þó að hámarki 150 fulltrúar.
2. Formenn sjálfstæðisfélaganna í Reykjavík.
3. Þingmenn og borgarfulltrúar Sjálfstæðisflokksins í Reykjavík sem og jafn margir varamenn þessara aðila.
4. Fastráðnir starfsmenn á skrifstofum flokksins og félaganna í Reykjavík, sem eiga lögheimili í Reykjavík.
5. Meðlimir miðstjórnar, fjármálaráðs- og upplýsinga- og fræðslunefndar sem lögheimili eiga í Reykjavík.
6. Allt að 100 fulltrúar samkvæmt tilnefningu stjórnar Fulltrúaráðsins til eins árs í senn, að loknum aðalfundi og skulu þeir að jafnaði valdir úr hópi þeirra manna, sem starfa í nefndum eða að ákveðnum verkefnum á vegum stjórnarinnar.
- 7 Flokksbundnir fyrrverandi alþingismenn Sjálfstæðisflokksins, flokksbundnir fyrrverandi borgarfulltrúar og fyrrverandi formenn Varðar – Fulltrúaráðsins sem lögheimili eiga í Reykjavík.

4. grein

Meðlimir Fulltrúaráðsins skulu eiga lögheimili í Reykjavík og vera félagar í einhverju sjálfstæðisfélaganna í Reykjavík.

Fulltrúarnir skulu vinna að þeim verkefnum í þágu Sjálfstæðisflokksins, sem stjórn

Fulltrúaráðsins og stjórnir sjálfstæðisfélaganna óska eftir hverju sinni og skulu fulltrúarnir keppa að því í öllum störfum sínum að efla styrk Sjálfstæðisflokksins og stefnu hans. Stjórn Fulltrúaráðsins getur skipað skipulagsnefnd, fjármálanefnd, útgáfu- og upplýsinganefnd og aðrar nefndir sem hún telur ástæðu til.

Störf fulltrúa og Fulltrúaráðsfunda eru trúnaðarmál og hafa fulltrúarnir þagnarskyldu um þessi málefni, að því leyti sem eigi er til ætlast að um þau vitnist til annarra. Rjúfi fulltrúi þennan trúnað eða brjóti að öðru leyti gegn reglugerð þessari í verulegum atriðum, skal stjórn Fulltrúaráðsins víkja honum úr ráðinu.

Stjórn Fulltrúaráðsins skal vera stjórnnum sjálfstæðisfélaganna innan handar við rekstur og skipulag þeirra. Óski stjórnir tveggja eða fleiri sjálfstæðisfélaga eftir því að fá að sameina starfsemi viðkomandi sjálfstæðisfélaga, þá skal stjórn Fulltrúaráðsins taka fyrirhugaða sameiningu til umræðu á fundi sínum og veita stjórnnum viðkomandi sjálfstæðisfélaga alla nauðsynlega ráðleggingu og aðstoð við undirbúning hins fyrirhugaða samruna. Þegar endanleg drög að samruna liggja fyrir skal stjórn Fulltrúaráðsins, í samvinnu við stjórnir viðkomandi sjálfstæðisfélaga, sjá um að kynna þau fyrir félagsmönnum viðkomandi sjálfstæðisfélaga. Áður en samruni gengur eftir skal hann borinn undir og samþykktur á aðalfundum allra þeirra félaga sem að honum koma. Hljóti fyrirhugaður samruni samþykkt allra viðkomandi sjálfstæðisfélaga þá skal hann í kjölfarið borinn undir stjórn Fulltrúaráðsins til staðfestingar.

Skjöl Fulltrúaráðsins skulu varðveitt á skrifstofu þess og aðgangur að þeim aðeins heimill þeim aðilum, sem stjórn Fulltrúaráðsins ákveður.

5. grein

Í Fulltrúaráðinu starfar stjórn sem ber ábyrgð á skyldum Fulltrúaráðsins milli funda.

Stjórn Fulltrúaráðsins skipa:

1. Formenn sjálfstæðisfélaganna í Reykjavík. Í forföllum þeirra koma varaformenn félaganna í þeirra stað. Varaformenn sjálfstæðisfélaga sem eiga 150 fulltrúa í Fulltrúaráðinu skulu eiga sæti í stjórn Varðar, samhliða formönnum viðkomandi félaga. Í forföllum þeirra koma gjaldkerar félaganna í þeirra stað.
2. Átta fulltrúar kosnir á aðalfundi Fulltrúaráðsins til eins árs í senn. Þar af skal formaður stjórnarinnar fyrstur kjörinn sérstaklega af aðalfundinum, en að öðru leyti skiptir stjórnin sjálf með sér verkum.

Telst atkvæðaseðill ógildur ef á honum eru nöfn annarra en þeirra, sem skilað hafa inn framboðum innan framboðsfrests og kjörgengir eru.

Nú gefa fleiri kost á sér til stjórnarstarfa en kjósa á og skal þá fara fram skrifleg kosning. Atkvæðaseðill við kjör meðstjórnenda telst gildur, ef á honum eru nöfn að minnsta kosti fjögurra frambjóðenda.

Skriflegum framboðum til stjórnar skal skilað til skrifstofu Sjálfstæðisflokksins í Reykjavík fyrir kl. 16.00 þremur dögum fyrir aðalfund.

Kjörgengir eru allir meðlimir fulltrúaráðsins.

6. grein

Stjórn Fulltrúaráðsins ber gagnvart miðstjórn ábyrgð á því, að flokksstarfið í kjördæmunum sé í samræmi við skipulagsreglur flokksins. Stjórn Fulltrúaráðsins fylgist með því að félögin í Reykjavík kjósi reglulega fulltrúa í Fulltrúaráðið. Er stjórnnum flokksfélaga skylt að gefa Fulltrúaráðinu upplýsingar um félagatölu og önnur þau atriði, sem stjórn Fulltrúaráðsins er nauðsynlegt til þess að geta gegnt hlutverki sínu.

Stjórn Fulltrúaráðsins boðar fundi svo oft sem þurfa þykir. Skylt er stjórn ráðsins að boða til fundar innan tveggja vikna ef um það berst skrifleg krafa frá 50 fulltrúum eða fleiri enda sé þar greint fundarefni.

Stjórn Fulltrúaráðsins skipar sér framkvæmdastjórn. Skulu formaður, varaformaður, framkvæmdastjóri, ritari auk eins stjórnarmanns sem stjórn Varðar kys í framkvæmdastjórnina, mynda framkvæmdastjórn Fulltrúaráðsins. Framkvæmdastjórn Fulltrúaráðsins undirbýr stjórnarfundi, annast almenn verkefni á milli stjórnarfunda og fer með önnur þau verkefni sem henni eru falin af stjórn Fulltrúaráðsins.

7. grein

Aðalfund Fulltrúaráðsins skal halda eigi síðar en í febrúar ár hvert.

Boða skal til fundarins með a.m.k. viku fyrirvara með almennri auglýsingu.

Á aðalfundi skulu tekin fyrir eftirfarandi málefni:

1. Skýrsla stjórnar um s.l. starfsár.
2. Kjör formanns og sjö annarra fulltrúa í stjórn ráðsins.
3. Kjör fulltrúa í flokksráð Sjálfstæðisflokksins. Félögin í Reykjavík hafa heimild til að

gera tillögu um flokksráðsmenn þannig:

Heimdallur 4 flokksráðsmenn

Hvöt 3 "

Óðinn 3 "

Skipting þessi verði endurskoðuð á tveggja ára fresti.

4. Önnur mál.

Að loknum aðalfundi skal stjórn Fulltrúaráðsins senda miðstjórn skýrslu um störf Fulltrúaráðsins, skipan í stjórn þess og trúnaðarstöður ásamt afriti skýrslna þeirra félaga sem aðild eiga að fulltrúaráðinu.

8. grein

Í aðdraganda kosninga til Alþingis eða borgarstjórnar í Reykjavík tekur Fulltrúaráðið í Reykjavík ákvörðun um hvernig vali á framboðslista flokksins skuli háttað. Ákvörðun um prófkjör, uppstilling eða röðun á lista skal vera í samræmi við skipulagsreglur flokksins og reglur miðstjórnar.

Í aðdraganda prófkjörs, miðstjórnarkjörs eða kosningar í kjörnefnd skal stjórn Fulltrúaráðsins skipa yfirkjörstjórn, sem annast undirbúning og framkvæmd kosningar. Í yfirkjörstjórn skulu formaður og framkvæmdastjóri Fulltrúaráðsins sjálfkjörnir, en að auki skal stjórn ráðsins skipa 3 menn. Yfirkjörstjórn skiptir sjálf með sér verkum. Verði einhver yfirkjörstjórnarmanna í framboði, kýs stjórn Fulltrúaráðsins mann í hans stað.

III. KAFLI

TRÚNAÐARMENN

9. grein

Trúnaðarmenn Fulltrúaráðsins, valdir samkvæmt 6. tölulið 3. greinar, skulu hafa það meginhlutverk að skýra fyrir kjósendum stefnu Sjálfstæðisflokksins í mikilsverðum málum. Þá ber þeim að aðstoða stjórnir sjálfstæðisfélaganna við að rækja þau störf sem nauðsynleg eru fyrir kosningar og á öðrum tímum, svo sem við úthringingar, útgáfustarfsemi og bréfasendingar

til Sjálfstæðismanna og almennra kjósenda. Trúnaðarmenn skulu leitast við að verða við boðun á ráðstefnur og málefnafundum flokksins.

10. grein

Stjórn Fulltrúaráðsins kallar stjórnir sjálfstæðisfélaganna og trúnaðarmenn til funda svo oft sem þurfa þykir.

Stjórn Fulltrúaráðsins er heimilt að skipa sérstaka nefnd til þess að aðstoða sig við val á trúnaðarmönnum og við önnur verkefni í sambandi við starfsemi trúnaðarmanna.

IV. KAFLI

ÁKVÖRÐUN UM FRAMBOÐSLISTA

11. grein

Þegar kosningar til Alþingis eða borgarstjórnar standa fyrir dyrum í Reykjavík, skal sérstök kjörnefnd starfa innan Fulltrúaráðsins. Kjörnefnd gerir tillögur um framboðslista Sjálfstæðisflokksins við kosningar í Reykjavík til Alþingis og borgarstjórnar. Í kjörnefnd eiga sæti 15 menn þannig valdir:

1. Einn fulltrúi skipaður af stjórn Heimdallar, einn fulltrúi skipaður af stjórn Hvatar, einn fulltrúi skipaður af stjórn Óðins, og fjórir fulltrúar skipaðir af stjórn Fulltrúaráðsins, þar af a.m.k. einn karl og ein kona, alls sjö fulltrúar.
2. Að öðru leyti skulu 8 kjörnefndarmenn kosnir af fulltrúum í Fulltrúaráðinu. Framkvæmd kosningarinnar skal vera í höndum yfirkjörstjórnar.

Með hæfilegum fyrirvara skal auglýsa í fjölmiðlum eftir framboðum til kjörnefndar.

Kjörgengir eru allir fulltrúar, sem á kjörskrá eru í Reykjavík.

Framboðsfrestur skal vera að minnsta kosti ein vika. Framboð telst gilt, ef það berst yfirkjörstjórn fyrir lok framboðsfrests enda sé gerð um það skrifleg tillaga af fimm fulltrúum hið fæsta og af ekki fleiri en tíu fulltrúum. Frambjóðandi gefur skriflega kost á sér til starfans. Berist ekki fyrir lok framboðsfrests tillögur um fleiri kjörnefndarmenn en kjósa á, teljast þeir sjálfkjörnir sem tillögur hafa verið gerðar um. En komi ekki fram tillögur um fulla tölu kjörnefndarmanna, skal stjórn Fulltrúaráðsins skipa svo marga til viðbótar, að kjörnefnd

verði fullskipuð.

Nú berast tillögur um fleiri menn í kjörnefnd en kjósa á og skal þá kosningastjórn að framboðsfresti liðnum auglýsa hvar og hvenær kosning fari fram.

Atkvæðaseðill telst ógildur ef á honum er merkt við nöfn færri manna en sjö, fleiri en átta eða nöfn annarra manna en þeirra sem í framboði eru.

Stjórn Fulltrúaráðsins setur nánari reglur um framkvæmd kosningarinnar.

Við þingrof er stjórn Fulltrúaráðsins heimilt að ákveða að kosning 8 kjörnefndarmanna skv. 2. tl. 1. mgr. þessarar greinar fari fram á Fulltrúaráðsfundi.

Stjórn Fulltrúaráðsins ákveður hver kallar kjörnefndina saman í fyrsta skipti, en nefndin kys sér sjálf formann.

12. grein

Þegar kjörnefnd er fullskipuð skal hún boða til fundar með stjórnnum Fulltrúaráðsins og sjálfstæðisfélaganna. Á fundi þessum skal rætt um væntanlegan framboðslista en ekki gerðar neinar samþykktir enda starfar kjörnefndin ekki á neinn hátt í umboði þessara aðila.

Kjörnefndin getur kallað slíka fundi oftár saman meðan hún situr að störfum, ef henni þykir svo henta.

Hafi fulltrúaráðsfundur tekið ákvörðun um að viðhafa prófkjör um skipan 12 eða færri af efstu sætum framboðslista við alþingiskosningar og í 16 eða færri af efstu sætum framboðslistans

við borgarstjórnarkosningar, er sú ákvörðun, prófkjörreglur Sjálfstæðisflokksins og reglur Fulltrúaráðsins um framkvæmd prófkjörs bindandi fyrir kjörnefndina. Framkvæmd prófkjörs er í höndum yfirkjörstjórnar samanber 8. gr.

Kjörnefnd skal kjósa fimm menn úr sínum hópi, er gangi frá tillögum til nefndarinnar um skipan í 10neðstu sæti framboðslistans við alþingiskosningar og í 14 neðstu sæti framboðslistans

við borgarstjórnarkosningar.

Kjörnefndarmaður skal víkja úr nefndinni og varamaður taka sæti hans, ef tillaga er borin fram í nefndinni um, að hann taki sæti á framboðslista Sjálfstæðisflokksins við kosningar til Alþingis eða borgarstjórnar í Reykjavík, sem væri aðal- eða varamannasæti í stofnunum þessum, miðað við fylgi flokksins í næstu kosningum á undan, enda samþykki kjörnefndarmaður

að frekari umræður fari fram í nefndinni um framboð hans.

Þegar kjörnefnd hefur gengið frá tillögum sínum um framboðslista skulu tillögur hennar lagðar fyrir Fulltrúaráðsfund, sem tekur lokaákvörðun um skipan listans, að áskilinni staðfestingu miðstjórnar Sjálfstæðisflokksins skv. XIV. Kafla 54. Gr. Skipulagsreglna Sjálfstæðisflokksins.

13. grein

Varðandi viðræður um meirihlutasamstarf við aðra flokka eða einstaklinga sem sæti eiga í borgarstjórn Reykjavíkur hafa borgarfulltrúar Sjálfstæðisflokksins samstarf við forystu Fulltrúaráðsins í Reykjavík. Þegar fyrir liggur tillaga um meirihlutasamstarf skal það ásamt málefnasamningi, liggja hann fyrir, kynnt og staðfest á fulltrúaráðsfundi.

V. KAFLI

GILDISTÖKUÁKVÆÐI OG FLEIRA

14. grein

Reglugerð þessi tekur gildi þegar hún hefur verið samþykkt á Fulltrúaráðsfundi. Um breytingar á reglugerðinni fer á sama hátt, enda hafi tillögur um breytingar á henni verið auglýstar á dagskrá funda þeirra, sem um þær eiga taka ákvörðun.